

**11 MAI
RUGĂCIUNEA 1
SF.CUVIOS CHIRIL FILOSOFUL/
SF.IERARH METODIE,
EPISCOPUL MORAVIEI,
APOSTOLII SLAVILOR**

Молитва

О преславнии язык словенских учителие и просветителие, святии равноапостольнии Мефодие и Кирилле. К вам, яко чада ко отцем, светом учений и писмен ваших просвещеннии и в вере Христовой наставлении, ныне усердно прибегаем и в сокрушении сердец наших молимся. Аще бо и завет ваших, яко чада непокоривая, не соблюдохом и о угождении Богу, якоже учисте, небрегохом, и от единомыслия и любви, юже словеном, яко братьям в вере и по плоти, добре завещасте, отпадохом, обаче, якоже древле в житии вашем неблагодарных и недостойных не отвращасте тщи, но благими за злая воздавасте, тако и ныне грешных и недостойных чад ваши молитвы не отвратите, но, яко велие имуще дерзновение ко Господу, прилежно Того молитесь, да наставит и

обратит нас на путь спасения, распри же и раздоры, посреде единовѣрныхъ братій возникающія, умирит, отпадшія паки во единомыслие приведет и всех нас единениемъ духа и любви во единей, Святей, Соборней и Апостольстей Церкви соединит. Вемы бо, вемы, яко много можетъ молитва праведника ко милосердію Владыки, аще и о грѣшныхъ людехъ приносима бывает. Не оставите убо нас, унылыхъ и недостойныхъ чадъ вашихъ, ихже грѣхъ ради паства ваша, вами собранная, враждою разделяема и соблазны отъ иноверныхъ прельщаема, умалися, овцы же ея словесныя разсеваемы, отъ волковъ мысленныхъ восхищаются, дадите убо намъ молитвами вашими о православии ревность, да ею возгреваемы, отеческая преданія добре сохранимъ, уставы и обычаи церковныя верно соблюдать потщимся, всякихъ лжеучений странныхъ отбежимъ и тако, в житіи богоугодномъ на земли преспевающе, жизни райския на небеси сподобимся, и тамо съ вами вкупѣ Владыку всехъ, въ Троицѣ Единого Бога прославимъ во вѣки вѣковъ. Аминь.